


地
74
854



金谿王氏鈔本

漢唐地理書

汝麋藏版

金谿王仁圃先生既舉明人所
為漢魏叢書重付剞劂復
採漢魏以來有錄無書諸引
見傳注類部中者分條纂集
得四百餘種一依叢書之例名之
曰漢魏遺書其經翼一門前已
授梓版忽不戒於火先生之志
未已也將謀諸同志盡取四百

金谿王氏鈔本

漢唐地理書

汝康藏版



金谿王仁圃先生既舉明人所
為漢魏叢書重付剞劂復
採漢魏以來有錄無書諸引
見傳注類部中者分條纂集
得四百餘種一依叢書之例名之
曰漢魏遺書其經翼一門前已
授梓版忽不戒於火先生之志
未已也將謀諸同志盡取四百

餘種者壽以行世而問叙于余
蓋自科舉之學盛而士之知
讀古書者少即古書之得傳于
世者益少其閒雖有通人傑士
慨往籍之淪沒網羅散佚集
成篇帙然不過一二種而止耳其
中又不無疎略待後人之補苴者
未有按錄按討不遺不漏如是

其多且備者也先生博極羣書
自少至老以古人為性命通籍後
弃吏職就教授於建昌晚且並
此而去之授徒自給勤懇之日
事箸錄凡館穀所入無不一用
之於書故其所成就如此然則古
人之全今雖不獲見矣而竒文奧
義嘉言善行往在焉則先

序
生之惠及前人而嘉予來學者
其功豈淺鮮哉敢學殖荒落
于先生無能為役因樂觀此書
之成或得枕藉其中文固陋焉
故不辭而為之叙嘉慶庚申
重九日年愚弟陽城張啟仁



序

金谿王仁甫先生編纂漢唐地理書鈔既成屬余爲
之序余聞昔人言地理之學倍難於天文天文躔度
次舍贏縮順逆終古不忒其經精而求之所謂千歲
之日至可坐而致也地理則不然疆域之分合靡常
陵谷之遷徙無定郡邑有僑置封國有假借物產有
盈絀風俗有移易或名同而地異或昔是而今非與
夫軌跡所不經情理所難囿怪怪奇奇紛紜轆轤不
可名狀差以銖黍失之秦越故曰難也自禹平水土

主名山川禹貢一篇先以九州次以道山道水次以五服若網在綱有條而不紊外此則山海經之作或曰伯益或曰後人所孱竄要其文簡奧質直斷爲先秦以上書無疑自時厥後作者蝟磔蠶起言愈多而緒愈麗文愈華而實愈晦自班范諸志不能無遺議况其下乎自吾論之其要有二學蘄博也識蘄精也識之精存乎其人學之博則非多識前言往籍無以折衷於至當先生積數十年心力哀集漢唐遺書多至四百餘種起自洪荒訖於唐季內而畿甸外而荒

裔凡有涉於山川井邑風土民物高文大冊殘編墜簡以及浮屠老子之書無不備載又能自豎偉識爬梳而剔抉之擷其要領芟其蕪曠部別而州分星聯而綺錯上可以備金匱石室之求下可以爲學士大夫殫見洽聞之助庶幾博而且精者矣先生所著十三經策案豫章文獻畧及校錄漢魏叢書遺書並已風行當世而此書之撰其功爲特隆吾鄉在宋元時若仲原父兄弟鄱陽洪氏馬氏並以夤雅才跨越一代先生生五百年後纂述之勤遂與鄉先賢比烈所

謂豪傑之士非與至其作書大推與其微意所在凡
例中言之已悉讀者亦宜自得之余不敏未敢爲駢
拇枝指也嘉慶十七年五月南城曾煥



慎畛頓首仁圃先生閣下客臘望後接海珊世
兄自湖北寄字知暫留賓谷廉訪署中談經考
道甚慰甚慰除日又從令甥煥其處敬領台教
並荷大君子碩大崇高之德賜製先母家傳慎
畛盥手捧誦不覺感極涕零念我母一生辛劬
無弗存心種德以爲燾覆後人計茲幸辱大賢
筆墨藉以不朽將何以仰副寵其所生過分之
愛拊膺自忖感悚交至夙興夜寐間惟永佩德
意於弗諉矣伏惟先生以鉅人長德著述等身

漢文選書鈔
一
蓋天下士心醉神沮所不敢異望其萬一者卽
所輯地理書網羅廢墜俾殘編賸簡頓還舊觀
而山川疆域人物事蹟關係

聖朝整飭綏輯之政者至宏且鉅豈第備郡邑志乘
采擇已哉元晏一序

當世自有任之者畛何人斯敢辱斯命蚊蠅商鉅
而欲使之負山馳河殊自哂其不稱也慎畛根
器淺薄賴先人教澤倖竊祿糈既不能力畚報
稱又復因循疲薊不亟以古藉自鞭撻埴索塗

茫無依據乃荷先生汲引後進盛心懃懃懇懇
一往情深至援太史公韓文公語以示責望之
意慎畛益惶悚四顧自處無地竊想先生旣以
古道自壽天故壽考福祿先生之身將以昌先
生之道使天下士皆得服教以闕俗擊蒙正莊
周所謂美成在久者也慎畛惟有力自振刷靜
心息氣復從校字諸君後受讀先生是書殊爲
我生之厚幸矣近擬於春抄夏初束裝北上將
來全書告竣如蒙賜教郵寄都中爲感鄙郡武

漢書地理志序
陵記武陵先賢傳武陵舊事等書若輯有副本
乞先鈔示肅此敬鳴謝悃統希澄鑒伏願福祉
熾新永繫後學之望臨穎母任欽企慎眇敬啟
此嘉慶庚午初春武陵趙篔樓先生覆札也
以謨先有書請序爲此婉辭而謙遜太過轉
增踧踏會將入都不及再請爰卽刊以代序

且志予愧

汝上附記

地理書鈔序

地理書鈔者鈔錄隋唐二志所載漢魏以來傳
記圖經以畧存陸任二家書鈔體例而資直省
州縣志書采輯也蓋自上古聖人仰觀天文俯
察地理而地理之書卽於是乎作顧三代以前
地理卽備於經若尙書禹貢周禮職方詩十五
國風春秋百二十國寶書皆是也三代以後地
理始詳於史獨怪太史公作史記不立地理書
致虞夏商周春秋戰國與秦漢地理若不相接

實爲曠闕賴班固氏起而志之一以漢制條列郡邑推表山川貫串詩書禹貢國風周官春秋下訖秦漢俾尙論者得確然知往古封建與後世州郡制度因革損益以及四海萬國輿圖廣袤之數誠國家要務而作史者尤當以是爲首重也歷稽前史莫不皆然惟陳壽三國志李延壽南北史以時非正朔一統海宇分裂疆域既有離合都邑又數遷易故不立志爲總大綱揆厥本原要不外乎九州十三州者近是然自是

經界愈分記載益繁州各有書郡各有志家自以爲土樂人自以爲風淳競殫見聞相爲祖述皆私家撰著不比正史流傳至齊陸澄始合山海經以來百六十家爲地理書梁任昉又增陸澄書八十四家謂之地記其別部自行者陸本凡四十二家任本惟十二家書目具載隋經籍志而其文亦多散見漢魏以下諸經史傳注及隋唐諸類書至宋太平興國中修御覽廣記寰宇記所引据猶數百種皆可傳信有資博雅而

爲直省府州縣志所遺棄而不錄者何可勝數
若更任其散軼勢且日就湮沒嗚呼是寧非載
筆者之過歟吾黨士大夫恭逢

聖世幸生樂國有山川靈秀足表人物奇偉足稽而
於其志乘曾不能網羅放失討論修飾勒成典
冊以發揮鄉國文獻美盛至與自古樸陋無文
者等其何以登大雅著作之林乎且將以是獻
之

王朝掌之外史尤不容因陋就簡草率成書也謨竊

有慨乎此故於編輯漢魏遺書地理一門遇有
關涉各府州縣山川古蹟人物故事必詳加考
訂分別甄錄而又觸類旁通上自天文星野下
至風謠物產以及四遠八荒殊俗異聞神仙鬼
怪之屬悉收入是編又益以隋唐後書增拓至
五百種雖不能使陸任全書體例復完庶於方
州地志零篇斷簡得所裒集以供採掇云爾
嘉慶辛未仲冬月長至日汝上老人王謨識

漢唐地理書鈔

凡例

一地理書本史部中別一門類茲乃於別史外更立地理書鈔名目緣隋書經籍志既載陸澄地理書一百四十九卷任昉地記二百五十二卷外又有陸氏地理書鈔二十卷任氏地理書鈔九卷自是因本書卷帙過多刪繁就簡撮其精要故謂之鈔書已盡亡體例無考茲則悉取漢魏以下諸州郡國傳紀圖經悉加哀輯蓋又欲拾陸任二家之遺

雖襲其名而實有不同

一初鈔漢魏遺書地理一門亦祇以百種爲率究於陸任二家原存五十二家外增益無幾且多記魏晉六朝時地理偏安割據非正朔一統不足以成大觀乃更合隋唐二志並加搜討增拓至五百餘種別爲漢唐地理書鈔

一我

皇朝德威遐播疆圉式闢極自古不臣之地盡歸版圖纂入

大清一統志固已集古今地理書大成盡美盡善筆削毫無遺憾若直省府州縣志雖各有總裁或未能一律完備有事修飾故爲鈔輯是書以資采擇一隋書經籍志地理書凡一百二十九部據言陸任二氏所採二百四十四家外尙有五十餘家當時雖有別本單行率皆散佚今悉按隋志開列書目次第鈔輯多者百數十條少者卽一二條各爲一篇仍於每篇叙錄標明隋志某人撰某書幾卷約計所存猶得七十家

一唐書藝文志地理類六十三家一百六部據言失姓名三十一家李播以下不著錄五十三家今亦不能確鑿分別大抵自李播以下皆隋唐後人撰著李播以上則皆隋唐前人地理書也今亦按唐志開列書目分別鈔輯凡已見隋志者則於叙錄本書下注云唐志同或唐志無若卷數不同則注云唐志幾卷亦有但見唐志者則注云隋志無若係隋唐人書則直以唐志爲主

一隋唐二志地理書通計共得二百四十五部內除

重書及隋唐後人書五十部尙不能抵陸任二家地理書多惜其名目俱無可考而太平御覽采用地理書目且近三百種良由隋唐二志皆當時現存原書御覽則祇從修文御覽文思博要藝文類聚諸書所采轉相承襲卽僅得一二條亦備列書目卷首大要皆陸任二家採擷之餘也今亦並加開列以存其目

一朱鬱儀氏謂隋唐之際圖史散失陸任所纂已不可得而竒編奧記往往散見水經注中則知水經

一注擷彼二百四十四家菁英居多誠爲六朝異書今故卽据朱氏箋本按諸地理分別采輯單辭隻句悉無遺漏間有舛誤亦爲訂正

一六朝時人注書如酈道元水經注及裴駟史記注劉昭郡國志注劉孝標世說注固多引地理書至賈思勰齊民要術稽含南方草木狀戴凱之竹譜宗懷荆楚歲時記等書亦間引諸州郡記今亦各從津逮秘書漢魏叢書本中鈔出與類聚御覽諸書參補

一太平御覽書目一千六百十九種內地理書約三百種較諸類書尤爲賅博惟此書最爲難得茲所借鈔亦係舊本活字板錯簡脫葉闕文訛字不可勝數苦無善本較對不敢以意補綴沿謬承訛在所不免甚有因而割棄不錄者用是質諸大家有能出所藏善本相爲校正者功德正非淺鮮

一太平廣記書目三百三十五種地理書僅三十餘種多已見御覽惟山河別記南海異事三吳三峽等記及諸州圖經數種未經別見雖皆稗雜小說

與諸地理書不類姑仍采錄

一樂史太平寰宇記本二百卷取自古山經地志考正訛謬纂成此書其所上表据稱原有目錄二卷今已無考約計所采地理書亦百數十種如韋昭三吳郡國志陶夔閩中記吳均入東記張之元吳興山墟名最古實係六朝前人書爲隋唐二志及御覽所不載今悉分別采補

一唐宋地理書存者元和郡國志太平寰宇記外有王存元豐九域志歐陽忞輿地廣記其書體要在

詳序歷代州郡沿革離合與其疆域廣袤四至入到之數而於山川古蹟人物故事絕少徵引無可采錄若元明一統志體例稍變間引唐宋前地理書悉爲哀輯

一文獻通考地理書目計一百九十種類皆宋人撰著隋唐前書僅十之一而已若關中記鄴中記湘中記多非舊本撰人亦別又有沈懷遠南越志七卷南朝宮苑記二卷係六朝人書當時猶存今未見傳本至唐人撰著惟元和郡國志現有刊本外

若十道志洽聞記渚宮故事嶺表錄異諸種有散見他書者悉以次鈔輯萃爲一編

一陶氏說鄒書目自身六十至六十八皆地理書多由類聚御覽諸本隨意採掇多者不過二三百頁或十數條且多舛誤今悉分別去取其有得自傳鈔舊本如豫章古今記陸廣微吳地記等書雖皆唐人述作亦仍原本鈔刻以廣流傳

一古今地理書稱名不一最初爲山海經後乃有東方朔神異經桑欽水經摯虞畿服經次則周官司

徒掌建九州之圖職方掌天下之圖後乃有秦地

圖漢輿地圖而隋唐州郡圖經因以起焉又次則

周官小史掌邦國之志外史掌四方之志春秋傳

有周志鄭志自是班固前漢書立地理志於後史

書必立地志而其外作者又有若闕駟十三州志

顧野王輿地志常據華陽國志沈懷遠南越志此

後世直省郡國志書之所由昉也若記之爲名亦

起於史記然在戰國時已有燕記趙記前漢書則

有東方朔十洲記林邑記王褒雲陽記魏晉以後

作者彌衆凡州郡地理書皆稱記其稱志者蓋無
幾焉其兼人物風俗言者則稱傳或稱錄若習鑿
齒襄陽耆舊傳圜稱陳留風俗傳趙岐三輔決錄
虞豫會稽典錄大抵皆託於外史別行者也外又
有稱疏者若漢宮闕疏竺法真羅山疏稱簿者若
洛陽宮殿簿河南郡境界簿稱狀者若稽含南方
草木狀徐衷南方草物狀稱名者若京相璠春秋
土地名張之元吳興山墟名雖各有取義要當以
志記二者爲通稱此亦古今地理書沿革大概也

隋志始載有隋諸州郡圖經集一百卷其前則有
冀州幽州齊州圖經各一卷三州以外尙未有圖
經也而李善文選蕪城賦注已引王逸廣陵郡圖
經則是圖經之名漢已有之至隋則始集諸州郡
圖經勒爲一書其他州郡圖經或仍自別行故如
御覽所采有泛稱隋圖經者有直稱某州某郡圖
經者其有志記可附者各散入州郡志記後無可
附者概歸隋圖經或中有唐時州縣亦未能一一
分析以隋始改郡爲州地理相沿故也

一隋唐二志並以州郡風俗土產入地理而以先賢耆舊列雜傳記則所謂郡國書也緣二志乙部史錄分十三類雜傳地理既分二類自應如此區別愚初鈔輯漢魏遺書以此二類並歸別史今因全書未能舉刻而別史門類既多卷帙益繁故特提出地理書別爲一門先附削刷而以先賢耆舊諸傳一併編入風俗傳異物志等書亦以類附焉

一 是書編次凡分四冊冊分數目又區爲十二門類亦自有綱有目有經有緯疆索廣輪縱橫離合可

以驗歷朝氣運盛衰者爲綱州居部次類聚羣分可以覘各方氣候通塞者爲目山川疆域星野風氣不可得而變革者爲經都邑名勝人物事迹有與時爲變通者爲緯大要先綱後目先經後緯庶亦有條不紊

一 是書編次門目既有先後故同一冀州記也盧植記主地理故列前荀綽記主人物故列後同一冀州論也盧毓論主地理故列前何晏論主人物故列後且同一習鑿齒襄陽記也而以記地理者居

前記者舊者居後同一譙周巴蜀志也而以志地理者居前志異物者居後體例則然非有參差舛錯

一嘗竊論修志書法省志宜詳於一統志府州縣志宜詳於省志以疆域有廣狹事迹有多寡紀載自宜有詳畧而以愚所見各府州縣志率多詳近而畧遠增新而損舊遠古事緒更多從畧卽所采摭又不引據原文標明書目殊難徵信亦有立意刊落羣書成一家言以示筆力高簡書法謹嚴者愚

謂以此作史則可非所語於修志也茲故專輯漢唐以來諸地理書五百種以備采擇

自隋唐以前諸地理書雖出私家撰述每多流傳如陸任二氏所采二百四十四家則皆在所已傳者也第如今所纂輯禹貢九州冀充徐揚荆豫雍梁皆有記而青州則無春秋戰國齊魯秦楚燕趙吳越巴蜀皆有記而韓魏則無五岳則嵩泰華衡皆有記而恒山獨闕四瀆則江淮河漢皆有記而濟水獨闕至郡邑記作者尤衆乃通都大邑如豐

沛南陽潁川宏農皆未有地記卽以光武詔南陽
撰作風俗而其書亦未有傳固知世遠年湮典策
淪亡書之傳與不傳亦有幸不幸則於其所不知
闕如也

一遺書比例經史子籍皆有合鈔附鈔茲地理書蒐
羅更廣名目紛繁體例更難畫一故有一書中合
數種一書後附數種者亦各以類相從取便鈔輯
詳見本書茲不覩縷

一遺書經史子籍凡有書目見隋唐志例於篇首叙

錄本書來歷流傳大概并各具作書人出處事迹
下附案語注引某書幾條若地理門采書過多實
難一一求詳或無叙錄則但於本書後加案語仍
注明引書條數以附體例

一全部遺書以次舉刻地理書自應最後因已未秋
遭回祿燬去經翼書板百種復拮据資斧重新翻
刻又經數載始克就緒心力已瘁遂將別史子餘
載籍各種遺書概行度置而以地理書一門最費
心編摩不忍終沒爲理舊編更加整頓以次開雕

附經翼後

一初鈔地理書目錄經友人萬載辛君炳喬傳至袁州於是袁州副閩雲坪樊公方有意修襄陽府志獨契是書卽差役至建昌學署錄取習鑿齒襄陽耆舊記南雍州記數種并屬少君助費校刊噉此數載未遑踐諾茲給諫武陵沅陵趙籛樓先生亦屬予甥鄭憲邦來鈔武陵沅陵諸傳記采入常德府志並卽捐惠詒書敦勉付梓愚初未得識荆二公乃各於數千里外不謀而合若有相爲應求者非以

愛土心臧故耶於是四方賢士大夫莅吾江右者亦皆薦念桑梓雅慕軒樂此地理書有成相與醵金伙助業已鳩工設局次第開雕第以功程浩大非常年所能殫加齒迫桑榆慮先霄墜猶願徼福當代大人先生幸假餘年得終歲事無替厥初則感且不朽

一 是編雖別爲漢唐地理書究以歸入漢魏遺書爲正以漢唐地理書名目甚大非區區鈔輯所能盡而謨材力本極薄劣見聞尤極寡陋茲所鈔輯又

海類通書金
一
祇據隋唐二志底本而參之以幾部類書數家地
志此外未見書目尙不知幾何則於其中句字安
能保無遺漏惟望博雅君子更廣蒐羅滙成大
觀以收先河後海之用而置此爲濫觴也可卽以
爲枝流也亦可

汝上老人王謨謹識

序錄

隋志河圖二十卷

梁河圖洛書二十四卷



隋書經籍志曰易曰河出圖洛出書蓋龜龍銜負出於河洛以紀易代之徵其理幽昧究極神道先王恐其惑人秘而不傳說者云孔子既叙六經以明天人之道知後世不能稽同其意故別立緯及識以遺來世其書出於前漢有河圖九篇洛書六篇

水經注引春秋命歷序曰河圖帝王之階圖載江

河山川州界之分野後堯壇於河受龍圖作握河紀逮虞舜夏商咸亦受焉

尚書刑德倣曰禹長於地理水泉九州得括象圖故堯以爲司空

尚書中候曰伯禹觀於河有長人魚身出曰吾河精也授禹河圖瓊入淵鄭元注曰卽括地象也

朱氏經義考曰攷禮正義天子祭天地山川文疏曰案地統書括地象云崑崙者地之中央東南地方五千里名曰神州此卽括地象之文然則括地

象又名地統書也

謨按歐陽公以河圖洛書爲怪妄東坡云著於易見於論語不可誣也但考河圖洛書初無文字後世乃傳有河圖九篇洛書六篇云自黃帝至周文王所授孔子又增演之以廣其意蓋出讖緯家言不可爲典要如春秋命歷序云圖載江河山川州界分野尚書緯又云禹得括地象圖故長於九州地理水泉則括地象乃河圖九篇中一篇名目實爲古今地理書祖惜其書久亡無可稽考惟朱氏

經義考悉緯門備載諸圖緯篇目於括地象云其
言雖夸大抵本鄒衍大九州之說因并節錄其文
而又不詳引原書致茫無所據茲故分別采錄凡
共鈔出詩疏一條周禮疏二條爾雅疏一條史記
正義一條後漢書注一條博物志一條類聚二條
初學記一條書鈔一條御覽五條文選注一條說
郛一條外附錄始開圖一條挺佐輔一條河圖玉
版四條又附錄洛書六條

河圖括地象

襄陽樊雄楚雲坪參

金谿王謨仁甫輯

天皇氏十二頭澹泊無所施爲而俗自化木德王歲
起攝提兄弟十二人各立一萬八千歲地皇十一頭
火德王姓十一人興于熊耳龍門等山亦各萬八千
歲人皇九頭乘雲車駕六羽出谷口兄弟九人分長
九州各立城邑凡一百五十世合四萬五千六百年

史記
正義

黃帝云予夢見兩龍挺白圖卽帝以授予于河之都
天老曰天授其帝圖乎試齋以往視之黃帝乃齋河
洛之間求象見者至于翠嬀前有太魚折溜而至乃
問天老子見中河折溜者乎見之與天老跪而受之
魚洸曰圖蘭采朱文以授黃帝舒視之名曰錄圖
舜以太尉卽位與三公臨河觀黃龍五采附圖出置
舜前以黃玉爲柙白玉爲檢黃金爲繩紫芝爲泥章
曰天黃帝符璽

洛水地理陰精之官帝王明聖龜書出天文以與命
地以授瑞按河合際居中護羣王道和洽吐圖佐神
逆名亂教摘亡弔存故聖人觀河洛也

黃河出崑崙山東北角剛山東以北流千里折西而
行至于南山南流千里至于華山之陰東流千里至
于植雍北流千里至于下津河水九曲長者入于激
海

九州殊題水泉剛柔各異青徐角羽集寬舒遲人聲
緩其泉酸以鹹荆陽角徵會氣漂輕人聲急其泉酸
以苦梁州商徵接剛勇漂人聲騫其泉苦以辛兗豫

徵合平淨有慮人聲端其泉甘以苦雍冀合商羽端
駛烈人聲捷其泉甘辛以醉酸

凡天下有九區別為九州中國九州名赤縣即禹之

九州也上並初學記引河圖
下皆河圖括地象

地有四游冬至地上行北而西三萬里夏至地下行

南而東三萬里春秋二分是其中矣地常動不止而

人不知居如閉舟而行不覺舟之運也御覽

禹既治水功大天帝以寶文大字賜禹佩渡北海弱

水之難初學記

易有太極是生兩儀兩儀未分其氣混沌清濁既分

伏者為天偃者為地爾雅疏。下皆
河圖括地

天有五行地有五岳天有七星地有七表天有八氣

地有八風天有九道地有九州天有四維地有四瀆

天有九部八紀地有九州八柱東南神州曰晨土正

南邛州曰深土西南戎州曰滔土正西弇州曰开土

正中冀州曰白土西南柱州曰肥土北方元州曰成

土東北咸州曰隱土正東揚州曰信土後漢書注。
業初學記引

河圖括地象于地有十州八柱句下有天地精通神

明列序二句又一本有崑崙之墟下洞含石赤縣之

州是為中國四句于正東揚州句下有天下九州西
效中域以盡地化三句又邛州作迎州兪州作拾州
與後漢書注文有詳異
字有異同故錄于此

天不足西北地不足東南西北為天門東南為地戶
天門無上地戶無下

八極之廣南北二億三萬三千五百里東西二億三

萬三千里並周禮疏

禹所治四海內地東西一萬八千里南北二萬六千

里有君長之州州有九中土之文德及而不治類

地部之位起形高大者崑崙山廣萬里高萬一千

里神物之所生聖人人之所集也出五色雲氣五

色流水其泉南流入中國名曰河也其山中應于天

居最中八十城布繞中國東南隅居其一分是奸

城也博物志

崑崙山為柱氣上通天崑崙者地之中也地下有八

柱柱廣十萬里有三千六百軸自帖引此地下有互

相牽制名山大川孔穴相通初學記

崑崙東南地方五千里石曰神州中有五嶽地圖帝

王居之

崑崙在西北其高萬一千里並文選注

崑崙之山為地首上為涇契滿為四瀆橫為地軸上

為天鎮立為八柱

崑崙之墟西有五城十二樓河水出焉四維多玉並御覽

覽

崑崙山出鐵券書鈔

武開山為地門上為天高星後漢書注引此文武開作武關天高作天齊

主囿國荆山為地雌上為軒轅星大別為地理以天

合地以通三危山在鳥鼠之西南夏紀索隱引此二句上為天

苑星岐山在崑崙東南為地乳上為天糜星岷山之

地上為東井絡帝以會昌神以建福上為天井星蜀書

秦宓傳注桐柏山為地穴上為維星鳥鼠同穴山地

之幹也上為掩畢星謂水出其中熊耳山地門也其

精上為畢附星耳按經義考引括地象文有大行天下之脊也句

岐山上多白金周之興也鸞鷲鳴于岐山時人亦謂

岐山為鳳凰堆

嶓嶭山上為狼星上有異花草名骨容食之無子並御覽

覽

河精上為天漢毛詩正義

井絡纏曜江漢晒靈泉流深遠盛為四瀆之首說

黃泉之埃上為黃雲青泉之埃上為青雲赤泉之埃

上為赤雲白泉之埃上為白雲元泉之埃上為元雲

書鈔引河圖始開圖

百世之後地高天下不風不雨不寒不暑民復食土

皆知其母不知其父如此千歲之後而天下倚杵洵

洵莫知始終初學記引河圖挺佐輔

河流九曲河導崑崙山一曲也東流千里至規其山

二曲也北流千里至積石也三曲也千里入隴首抵

龍門四曲也南流千里至龍首至卷重山五曲也東

流貫砥柱觸闕流山六曲也東至洛會七曲也東至

大伾山八曲也東至絳水千里至大陸九曲也經義考引

河圖緯象

從崑崙以北九萬里得龍伯國身長三十丈生萬八

千歲而死從崑崙以東得大秦人長十丈皆衣帛從

此以東十萬里得佻人國長三十丈五尺從此以東

十萬里得中秦國人長一丈下皆河圖玉版

西王母居崑崙之山

少室山其上有白玉膏一服即仙

湘夫人者帝堯女也秦始皇浮江至湘山逢大風而

問博士湘君何神博士曰聞之堯二女舜妃也死而

葬此並山海經注

人皇始出于提地之山九男兄弟相像以別長九州

為九圍人皇乃有中州制八輔

人皇兄弟九人別長九州離艮地精女出為之后宋

均曰離艮卦所推也

周天三百六十五度四分度之一夫一度為千九百

三十五里

後漢書注引此下云日一日行一度月一日行十三度十九分度之一也則天

地相去六十七萬八千五百里

並御覽

舜受終鳳凰儀黃龍感朱草生蓂莢孽西王母授益

地圖類聚

月者陰之精地之地說郛

岍為角岐為亢荆山為氏壺口為房雷首為心大岳

為尾砥柱為箕析城為斗王屋為牛大行為須女恒

山為虛碣石為危西傾為室朱圍為壁鳥鼠為奎大

華為婁熊耳為胃外方為昴桐柏為畢陪尾為觜嶓
冢為參荆山為東井內方為鬼大別為柳岷山為星

衡山為張九江為翼敷淺原為軫李淳風乙巳占按
經義考云此述洛

書以禹貢山川分配二十八宿
實屬創聞諸地志從未稱引

按隋志本無洛書卷目諸書稱引間有篇名若甄
曜度靈准聽摘亡辟之類今亦不復分析惟取關

涉地理者畧存數條於此

序錄

隋志張衡撰靈憲一卷唐志同

後漢書本傳曰張衡字平子南陽西鄂人也少善

屬文尤致思於天文陰陽歷算作渾天儀著靈憲

算罔論言甚詳明注引靈憲序曰昔在先王將步

之于渾體是為正儀故靈憲作與衡集復造候風

地動儀自書典所記未之有也

按劉昭後漢志注云張衡天文之妙冠絕一代所

著靈憲渾儀畧具辰曜之本故寫載以備其理今

考靈憲雖專論天文與地理實相表裏如言水氣精為漢山嶽氣鍾為星此皆造物自然之符其奧妙不易得而窺也而類聚引靈憲言崑崙神州初學記引靈憲言中州八輔則又皆屬地理然語亦不詳疑靈憲本文有未全也今故仍從漢注采錄本文并鈔出類聚初學記一條而以地動儀附於其後

張衡靈憲

金谿王 謨仁甫輯

弟 諧端圃校

太素之前幽清元靜寂寞冥默不可為象厥中為靈厥外為無如是者永久焉斯謂溟滓蓋乃道之根也道根既建自無生有太素始萌萌而未兆并氣御覽作體同色渾沌不分御覽作坤屯不分音渾沌故道志之言云有物渾成先天地生其氣體固未可得而形其遲速固未可得而紀也如是者又永久焉斯謂龐鴻類聚作龐洪蓋乃

道之幹也道幹既育有物一作萬物成體于是元氣剖判

剛柔始分清濁異位天成于外地定于內天體于陽

故圓以動地體于陰故平以靜動以行施靜以合化

堙鬱構精時育庶類斯謂太元蓋乃道之實也在天

成象在地成形天有九位地有九域天有三辰地有

三形有象可效有形可度情性萬殊旁通感薄自然

相生莫之能紀于是人之精者作聖實始紀綱而經

緯之八極之維徑二億三萬二千三百里南北則短

減千里東西則廣增千里自地至天半于八極御覽引此

御覽

文云一億一萬六千二百五十里則地之深亦如之書鈔引此文云地深一億一萬

六千二百里故通而度之則是渾已將覆其數用重

至厚莫如地御覽薄地之義御覽皆移千里而差

鈎股懸天之景御覽薄地之義御覽皆移千里而差

一寸得之過此而往者未之或知也未之或知者宇

宙之謂也宇之表無極宙之端無窮天有兩儀以儔

道中其可觀樞星是也謂之北極在南者不著故聖

人弗之名焉其世之遂九分而減二陽道左廻故天

運左行有驗于物則人氣左羸形左繚也天以陽廻

地以陰淳是故天致其動稟氣舒光地致其靜承

施候明天以順動不失其中則四序順至寒暑不減
致生有節故品物用生地以靈靜作合承天清化致
養四時而後育故品物用成凡至大莫如天至厚莫
如地地至質者曰地而已至多莫若水水精爲漢漢
用于天而無列焉思次質也地有山嶽以宣其氣精
種爲星星也者體生于地精成于天列居錯時一作時
各有適屬紫宮爲皇極之居太微爲五帝之庭明堂
之房太角有席天帝有坐蒼龍連蜷于左白虎猛據
于右朱雀奮翼于前靈龜書鈔作匿首于後黃神書鈔作龍

軒轅于中則軒轅一星與蒼龍白虎朱雀元武四獸

爲五矣

則軒轅下十九字從書鈔補錄

六擾既畜而狼虬魚鼈罔有

不具在野象物在朝象官在人象事于是備矣懸象

著明莫大乎日月其徑當天周七百三十六分之一

地廣二百四十二分之一日者陽精之宗積而成鳥

象鳥而有三趾陽之類其數奇月者陰精之宗積而

成獸象兔陰之類其數耦其後有馮焉者羿請無死

之藥于西王母姮娥竊之以奔月將往枚筮之于有

黃有黃筮

一作占

之曰吉翩翩歸妹獨將西行逢天晦

芒母驚母恐後其太且一作昌姮娥遂託身于月是爲

蟾蜍夫日譬猶火月譬猶水火則外光水則含景故

月光生于日之所照魄生于日之所蔽當日則光盈

就日則光盡也衆星被曜因水轉光當日之衝光嘗

不合者蔽于地也是謂闇虛在星星微月過則食日

之薄地其明也繇闇視明明無所屈是以望之若火

方于中天天地同明繇明瞻闇闇還自奪故望之若

水火當夜而揚光在晝則不明也月之于夜與日同

而差微星則不然強弱之差也衆星列布其以神著

有五列焉是爲三十五名一居中央謂之北斗動變

挺占實司主命四布于方各七爲二十八宿日月運

行歷示吉凶五緯經一作次用告禍福則天心于是

見矣中外之官常明者百有二十四可名者三百二

十爲星二千五百而海人之占未存焉微星之數蓋

萬一千五百二十庶物蠢蠢咸得繫命不然何以總

而理諸夫三光同形有似珠玉神守精存麗其職而

宣其明及其衰神歇精斁于是乎有隕星然則奔星

之所墜至則石文曜麗乎天其動者有七日月五星

是也周旋右回天道者貴順也近天則遲遠天則速
行則屈屈則留回留回則逆逆則遲迫于天也行遲
者覲于東覲于東屬陽行速者覲于西覲于西屬陰
日與月此配合也攝提熒惑地候見晨附于日也太
白辰星見昏附于月也二陰三陽參天兩地故男女
取焉方星巡鎮必因常度苟或盈縮不逾于次故有
列司作使曰老子四星周伯王逢芮各一錯乎五緯
之間其見無期其行無度實妖經星之所然後吉凶
宣周其祥可盡

後漢書天文志注

崑崙東南有赤縣之州風雨有時寒暑有節苟非此
土南則多暑北則多寒東則多陽西則多陰故聖王

不處焉

類聚

中州含靈外制八輔

初學記

張衡字平子造候風地動儀以精銅鑄成圓徑八寸
合蓋隆起形似酒樽飾以篆文山龜鳥獸之形中有
都柱旁行八道施關發機外有八龍首銜銅丸下有
蟾蜍張口承之牙機巧制皆在罇中覆蓋周密無際
如有地動罇則震龍機發吐丸而蟾蜍承之振聲激

揚因此覺知雖一龍發機而七首不動尋其方面乃
 知震之所在驗之以事合契若神自書契所記未曾
 有也嘗龍發機而地不覺動咸怪其無徵數日後驛
 至果地動隴西人皆服其妙

白帖引續漢書○按范
 書本傳以地動儀為陽

嘉元
 年造



禹受地記

崑崙東南地方五千里名曰神州

杜氏通典注引禹受地統書

河出崑崙崑崙其高二千五百餘里日月所相隱避

為光明也其上有醴泉瑤池

史記大宛列傳贊引禹本紀

崑崙去嵩高五萬里蓋天地之中也

山海經注引禹本紀

涓盤之水出崦嵫山

王逸離騷注引禹大傳

禹曰天下名山經五千三百七十山六萬四千五十

六里居地也山居其五臧蓋其餘小山甚衆不足記

云天地之東西二萬八千里南北二萬六千里出水之山者八千里受水者八千里出銅之山四百六十七出鐵之山三千六百九十此天地之所分壤樹穀也戈矛之所發也刀鍛之所起也能者有餘拙者不足封于太山禪于梁父七十二家得失之數皆在此內是謂國用

按王伯厚困學紀聞以三禮義宗引禹受地記王逸注離騷引禹大傳疑卽大史公所謂禹本紀今考史記大宛傳贊引禹本紀言河出崑崙自後郭

璞注山海經酈道元注水經于河出崑崙並引本

紀初不及禹受地記

按水經注云葱嶺之水東爲河源禹記所云崑崙者焉此

禹記正謂禹受地記

卽如紀聞言出三禮義宗而義宗書旣

不傳其說亦無可考惟杜氏通典注言先儒皆引禹受地統書云東南地方五千里名曰神州先儒意卽指崔靈恩三禮義宗受地統書卽禹受地記也而朱氏經義考又以地統書爲河圖括地象亦未知得其實茲故卽以地統書合禹受地記而以禹本紀禹大傳及山海經禹自言五臧山數文並

箸一篇

出大物及山地雖海自育正地山地文前

朱喉碎其質甚薄且以賦蘇善合與公賦時而以

出而卷乃添善香文以賦蘇善合與公賦時而以

善蘇賦蘇善合與公賦時而以

禹金賦蘇善合與公賦時而以

下其賦蘇善合與公賦時而以

禹金賦蘇善合與公賦時而以

禹金賦蘇善合與公賦時而以

禹金賦蘇善合與公賦時而以



裴秀禹貢九州制地圖論

金谿王 謨仁甫輯

圖書之設由來尚矣自古垂象立制而賴其用三代
置其官史掌其識暨漢祖屠咸陽丞相蕭何盡收秦
之圖籍今秘書既無古今之地圖又無蕭何所得秦
圖書唯有漢氏所畫輿地及諸襍圖各不設分率又
不考正准望亦不備載名山大川其所載列雖有麤
形皆不精審不可依據或稱外荒迂誕之言不合事
實於義無取今置地圖之體有六一曰分率所以辨

廣輪之道也二曰准望所以正彼此之體也三曰道里所以定所由之數也四曰高下五曰方邪六曰迂直此六者各因地而制形所以校夷險之故也有圖象而無分率則無以審遠近之差有分率而無准望雖得之於一隅必失之於他方雖有准望而無道里則施於山海絕隔之地不能以相通有道里而無高下方邪迂直之校則徑路之數必與遠近之實相違失准望之正故必以此六者參而考之然後遠近之實定於分率彼此之實定於准望徑路之實定於道

里度數之實定於高下方邪迂直之算故雖有峻山巨海之隔絕域殊方之迴登降詭曲之因皆可得舉而定者准望之法既正則曲直遠近無所隱其形也

類聚

按晉書列傳裴秀字季彥河東聞喜人武帝受禪官尚書令左光祿大夫久之以爲司空秀儒學洽聞職在地官以禹貢山川地名從來久遠多有變易後世說者或疆牽引漸以暗昧於是甄摘舊文疑者則闕古有名而今無者皆隨事注列作禹貢

地域圖十八篇奏之藏於秘府而隋唐二志俱無
此書目豈此圖十八篇當日果但藏諸秘府未及
頒布郡國獨其所自序得流傳於世耶今故仍從
藝文類聚鈔出此篇夫八公以藏同空衣歸學命

海國圖志卷之二十一 地理考 南洋 坤甸 坤甸



揚雄十二州箴

鄰水廖

寅復堂參

金谿王

謨仁甫輯

冀州箴

洋洋冀州鴻原大陸嶽陽是都島夷皮服潺湲河流

表一作夾以碣石三后攸降列爲侯伯降周之末趙魏

是宅冀土糜沸沄沄如湯更盛更衰載從載橫陪臣

擅命天王是晉趙魏相反秦拾其敝北築長城恢夏

之場漢興定制改列一作封藩王仰覽前世厥力合作

孔多初安如山後崩如崖故治不忘亂安不忘危周
宗自怙云焉有予隳六國奮矯果絕其維牧臣司冀
敢告在階

揚州箴

矯矯揚州江漢之滸彭蠡既瀕陽鳥攸處橘柚羽貝
瑤琨篠簜閩越北垠沅湘攸往獷矣淮夷蠢蠢荆蠻
翩彼昭王南征不旋人咸躓於埵莫躓於山咸跌於
污莫跌於川明哲不云我昭童蒙不云我昏湯武聖
而師伊呂桀紂悖而誅逢干蓋邇不可不察遠不可

不親靡有孝而逆父罔有義而忘君太伯遜位基吳
紹類夫差一誤太伯無祚周室不匡句踐入霸當周
之隆越裳重譯春秋之末侯甸叛逆元首不可不思
股肱不可不孳堯崇一作勤屢省舜盛欽謨牧臣司揚
敢告執籌

荊州箴

杳杳一作幽幽巫山在荆之陽江漢朝宗其流湯湯夏君
遭澤一作鴻荆衡是調雲夢塗泥包匭菁茅金玉砥礪
象齒元龜貢篚百物世世以饒戰戰慄慄至桀荒溢

日在帝位若天有日不順庶國孰敢余奪亦有成湯
果秉其鉞放之南巢號之以桀南巢茫茫包楚與荆
風飄以悍氣銳以剛有道後服無道先強世雖安平
無敢逸豫牧臣司荆敢告執御

青州箴

茫茫青州海岱是極鹽鐵之地鉛松怪石羣水攸歸
萊夷作牧貢篚以時莫怠莫違昔在文武封呂于齊
厥土塗泥在止之營五侯九伯是討是征馬殆其銜
御失其度周室荒亂小白以霸諸侯僉服復尊京師

小白既沒周卒凌遲嗟茲天王附命下土失其法度
喪其文武牧臣司青敢告執御

徐州箴

海岱伊淮東海是渚徐州之土邑於蕃宇大野既瀦
有羽有蒙孤桐蠙珠泗沂攸同實列蕃蔽侯衛東方
民好農蠶大野以康帝癸及辛不祇不恪忱愾于酒
而忘其東作天命湯武勦絕其緒祚降周任姜鎮於
琅瑯姜氏絕苗田氏攸都事由細微不慮不圖禍如
正山本在萌牙牧臣司徐敢告僕夫

兗州箴

悠悠濟河兗州之寓九河既道雷夏攸處草繇木條
漆絲締紵濟渭既通降正宅土成湯五徙卒都於亳
盤庚北渡牧野是宅丁感雉雉祖已伊忠爰正厥事
遂緒高宗厥後陵遲顛覆厥緒西伯戡黎祖伊奔走
致天威命不恐不震婦言是用牝雞是晨三仁既知
武果戎殷牧野之禽豈復能耽甲子之期豈能復笑
有國雖久必畏天咎有民雖長必懼人殃箕子獻欵
厥居為墟牧臣司兗敢告執書

豫州箴

郁郁荆河伊洛是經滎播一作泉漆惟用攸成田田

相挈廬廬相距夏殷不都成周攸處豫野所居爰在
鶉墟四隩咸宅寓內莫如陪臣執命不慮不圖王室
陵遲喪其爪牙靡哲靡聖捐矢其政方伯不維韓卒
擅命文武孔純至厲作昏成康孔寧至幽作傾故有
天下者毋曰我大莫或余敗毋曰我強靡克余亡夏
宅九州至於季世放於南巢成康太平降及周微帶
蔽屏營屏營不起施于孫子王赧為極實絕周祀牧

臣司豫敢告柱史

雍州箴

黑水西河橫截崑崙邪指閭闔畫爲雍垠上侵積石
下礙龍門自彼氏羗莫敢不來庭莫敢不來匡每在
季王常失厥緒侯紀不貢荒侵其寓陵遲衰微秦據
以戾興兵山東六國顛沛上帝不寧命漢作京隴山
以徂列爲西荒南排勁越北啟疆胡并連屬國一護
攸都蓋安不忘危盛不諱衰牧臣司雍敢告綴衣

益州箴

巖巖岷山古曰梁州華陽西極黑水南流茫茫洪波
鯨堙降陸于時八都厥民不隩禹導江沱岷嶓啟乾
遠近底貢磬錯砮丹絲麻條暢有稷有稻自京徂畛
民攸溫飽帝有桀紂酒沈頗僻遏絕苗民滅夏殷績
爰周受命復古之常幽厲夷業破絕爲荒秦作無道
三方潰叛義兵征暴遂國于漢拓開疆宇恢梁之野
列爲十二光羨虞夏牧臣司梁是職是圖經營盛衰
敢告士夫

幽州箴

蕩蕩平川惟冀之別北阨幽都戎夏交偪伊昔唐虞
實惟平陸周永薦臻迫于獯鬻晉失其陪周使不阻
六國擅權燕趙本都東限穢貊羨及東胡強秦北排
蒙公城墻大漢初定介狄之荒元戎屢征如風之騰
義兵涉漠偃我邊萌既定且康復古唐虞盛不可不
圖衰不可或忘隄潰蟻穴器漏鍼芒牧臣司幽敢告
侍旁

并州箴

雍別朔方河水悠悠北辟獯鬻南界涇流畫茲朔土

正直幽方自昔何爲莫敢不來貢莫敢不來王周穆
遐征犬戎不享爰貊伊德侵玩上國宣王命將攘之
涇北宗周罔職日用爽蹉旣不俎豆又不干戈犬戎
作難一作亂斃于驪阿太上曜德其次曜兵德兵俱顛
靡不悴荒牧臣司并敢告執綱

交州箴

交州荒裔水與天際越裳是南荒國之外爰自開闢
不霸不絆周公攝祚白雉是獻昭王陵遲周室是亂
越裳絕貢荆楚逆叛四國內侵蠶食宗周臻于季報

遂入滅亡大漢受命中國兼該南海之宇聖武是恢
稍稍受羈遂臻黃支杭海三萬來牽其犀盛不可不
憂隆不可不懼顧瞻陵遲而忘其規摹亡國多逸豫
而存國多難泉竭中虛池竭瀨乾牧臣司交敢告執
憲

冀趙常山

下皆王隆漢官
解詁○胡廣注

經曰冀州既載居趙國今治常山

兗衛濟河

經曰濟河惟兗州衛國今治山陽

青齊海岱

經曰海岱惟青州居齊國今治焉

徐魯淮沂

經曰海岱及淮惟徐州又曰淮沂其乂居魯國今

居豫州而治東海

揚吳彭蠡

經曰淮海惟揚州又曰彭蠡既豬居吳國今治九

江

荆楚衡陽

經曰荆及衡陽為荊州居楚國今治武陵

益庸岷梁

經曰華陽黑水為梁州漢改梁州為益州今治廣

漢

涼邠黑水

經曰黑水西河為雍州居邠國漢改雍州為邠州

國右扶風栒邑縣屬司潁部不屬州今治漢陽

雍別朔方

漢別雍州之地置朔方刺史

按此注未詳治所應考

交趾南越

漢平南越之地置交趾刺史別諸州治蒼梧

幽燕朝鮮

經無幽州而周官有焉蓋冀之別也居燕國今廣

陽是

按漢志有廣陽國本高帝燕國昭帝元鳳元年為廣陽郡有廣陽縣

并代晉翟

經無并州而周官有益冀州之別也居燕國今廣

陽是

並御覽按此據夏制以幽并為皆冀州之別是也并以為居燕國今廣陽則誤

按前漢書揚雄傳雄擬古著作以為箴莫大於虞

漢書地理志序堯遭洪水天下分絕爲十二州禹
治水土更別九州殷因於夏亡所變改周監二代
而損益之改禹徐梁合之雍青分冀州地爲幽并
秦并四海分天下爲郡縣漢因秦制至武帝開地
斥境南置交趾北置朔方之州並徐梁幽并夏周
之制改雍曰涼改梁曰益凡十三部置刺史則是
古今地理在虞夏爲十二州在漢爲十三部乃揚

雄爲箴有交州而無營州固不純用夏制胡廣注
解漢官有朔方交州而遺豫州又不純用漢制意
以豫州時爲司隸故不列十三州而王隆漢官本
書已亡今亦祇從御覽采出數語其全文固無考
也並錄於此以俟識者審定



Vertical text on the left side of the image, partially obscured by a watermark. The text is written in a traditional Chinese style, likely a calligraphic or semi-cursive script. It appears to be a list or a series of entries, possibly related to the '海東文庫' (East Sea Library) mentioned in the header.



尚書地說

金谿王 謨仁甫輯

河水東流貫砥柱觸關流今世所謂砥柱者蓋乃關
流也砥柱當在西河

酈道元云案鄭元所引地說非是西河當無山以礙之自砥柱以下五戶已上其間一百二十里河水竦石架出勢連襄陸蓋亦禹鑿以通河疑此關流也

大河東北流過絳水千里至大陸為地腹

酈道元云按鄭元據

尚書有東過洛汭至於大伾北過降水至於大陸推
次言之故以淇水為降水共城為降城所未詳也稽
之羣書共縣故本共和之故國是有其名不惡降而
更稱禹著山經淇出沮洳淇澳衛詩列目又遠當非
改絳葦為今號但是水導源共山北元欲因成降議
故以淇水為降水耳即如元引此說黎陽鉅鹿非干

里之逕直信都於大陸者也唯屯氏北出館陶事近之矣○按此二條並水經注采鄭注尚書引地說原文而酈道元駁之故詳著其說

漢水出荆山東南流為滄浪之水是近楚都故漁父歌曰滄浪之水清兮可以濯我纓滄浪之水濁兮可以濯我足

漢水東行觸大別之陂南與江合

漢與江合於衡北翼際山傍

沔水東行過三澨合流觸大別山陂

熊耳之山地門也洛水出其間

鳥鼠山同穴之枝幹也渭水出其中東北流過同穴

枝間

並水經注

三危山黑水出其南

三危山在鳥鼠西南與岐山相連

合黎山在酒泉會水縣東北

並史記夏本紀索隱

河東郡青山東山中有二泉下南流者媯水北流者

泃水二水

御覽引此下有西經歷山下五字

異泉合流出谷西注河

水北曰泃也

下皆地記

河東縣二里故蒲坂城舜所都也城中有舜廟城外

有舜宅及二妃壇並史記五帝本紀正義

弱水西流入合黎山腹餘波入於流沙通於南海

三危山在鳥鼠之西南

漢水出荆山東流為滄浪水並夏本紀正義

河東北縣古魏國

皮氏縣水南耿城是故耿國並宋世家索隱

唐氏在大夏之墟屬河東永安縣今在絳城西北一

百里有唐城者以為唐舊國趙世家正義

洛水東北過五零陪尾北與澗瀍合

洛水東入於中提山間東流會於伊並水經注

按此地說不知何人所撰鄭元注尚書再引其說

是此書必作於鄭氏以前至酈氏注水經及唐初

人為史記正義索隱猶及見之而隋志不載豈遂

已散佚乎惟是諸書往往引作地記記說二字最

易淆混又其所說皆尚書禹貢地理水道故可據

以解經箋史必非梁任昉所鈔輯之地記也今惟

當以地說主名或作地記亦各從所見采錄凡共

鈔出地說十一條地記十一條



Large stylized characters, likely a watermark or a decorative element, overlaid on the page. The characters are arranged in a vertical column and appear to be a stylized representation of the Chinese characters '海委' (Hǎi Wěi), which is the title of the book mentioned in the header.

四方令

金谿王 謨仁甫輯

湯問伊尹曰諸侯來獻或無馬牛之所生而獻遠方之物事實相反不利非其所有而當遠求於民故不利也今吾欲因其地勢所有獻之必易得而不貴其為四方獻令制其品服

之伊尹受命於是為四方令曰臣請正東符婁仇州

伊慮漚深九夷十蠻越漚鬣文身十者東夷蠻越之稱鬣髮文身因其

事以言請令以魚支之鞞口鯁之醬鮫鼈利劍為獻

之也鞞刀鞞魚名鼈盾也正南甌鄧桂國損子產里百

濮九菌六者南蠻之別名請令以珠璣瓊瑁象齒文犀翠羽

菌鶴短狗為獻璣似珠而小菌鶴可用為旌翳短狗狗之善者也正西崑崙

狗國鬼親枳已闕耳貫胸雕題離丘漆齒九者西戎之別名也

闕耳貫胸雕題漆齒等亦因其事以名之也請令以丹青白旄紕蜀江歷

龍角神龜為獻江歷珠名龍解角得也正北空同大夏莎車姑

他且畧貌胡戎翟匈奴樓煩月氏熾犁其龍東胡二十

者北狄之別名也戎狄在西北界戎翟之間國名也請令以橐駝白玉野馬騊

駼馱良弓為獻湯曰善

按此地理書雖以漢唐為目實則上溯唐虞三代

惟殷商一代地理未見經傳若爾雅九州注家雖

以為殷制然無考証惟逸周書王會解伊尹朝獻

商書湯問伊尹伊尹受命為四方令云云內如崑

崙九夷見尚書雕題漆齒見禮記百濮鄧越見左

傳闕耳貫胸見山海經空同見爾雅大夏煩樓旬

奴月氏見國策史記四方外國皆與虞夏周秦前

後地理相接故特采錄以補殷代地制之闕至竹

書紀年注謂殷王武丁大仁輿地東不過江黃南

不過蠻荆西不過氏羗北不過朔方而頌聲作蓋

特以其時中國大勢度之實不足以盡禹貢九州之境也時亦無汭黃二國按此注亦祇據漢書賈捐之諫罷珠崖疏爲說未足信

